

INUIT ATAQATIGIIT

INATSISARTUNI



Nuuk, 26. september, 2013

Inatsisartut suleriaasianni § 37 naapertorlugu Naalakkersuisunut apeqqutit imaattut saq-qummiuppakka.

(Inatsisartuni ilaasortaq Sara Olsvig, Inuit Ataqtigiiit)

Apeqqutit:

- 1) Uran aammalu atortussat allat qinggornermik ulorianartunik akullit pillugit USA arlaatigut oqaloqatigineqarpa, imaluunniit oqaloqatigineqarsimava?
- 2) Qulaaniittoq angerneqassappat, taava uranimut atortussanullu allanut qinggornermik uloriarnartunik akulinnut atatillugu suut suleqatigiissutigineqarsinnaasutut USA-mut Naalakkersuisut saqqummiussimavaat?
- 3) Qulaaniittoq naaggaarneqassappat, taava pineqartup tungaatigut suleqatigiittoqarnissaa pillugu Naalakkersuisut USA attaviginialersaarpaat?
- 4) Naalakkersuisut allapput Asia-mi naalagaaffiit pissaanilissuit Kalaallit Nunaannut soqutiginnikkiartorerat ilutigalugu politikki nunap inissisimaneramik sillimaniarnermillu aallaavilik naammassiuminaalliartuinnartoq, tamanna qanoq paasisariaqarpa?
- 5) Asia-mi naalagaaffiit pissaanilissuit sorphaanukua pineqartut?
- 6) Naalakkersuisut isumaat malillugu suunukua nioqqutissiat sanaallu Kalaallit Nunaata "Asia-mi pissaanilissuarninngarnit" USA-mut niuerutiginerulluarlugillu suleqatigiissutiginerusinnaagai?

Tungavilersuut:

Naalakkersuisut 2013-imi Nunanut allanut tunngasutigut naalakkersuinikkut ingerlatsineq pillugu nassuiaammi allapput Washington D.C.-imi sinniisoqarfimmik pilersitsinissaq uran pillugu apeqqummut iluaqutaajumaartoq, tassami

"Suliffissaaleqineq akiorniarlugu pisariaqarpoq avammut niuernikkut ingerlataqarfiit nukittorsarnissaat. Nunanik allanik niueqateqarnissamik isumaqatigiissuteqarnerit inuusstissarsiuutit toqqammavitsigut atugaasa nukittorsarniarlugit salliutinissaa pingaarpoq. Washington D.C.-mi Kalaallit Nunaata Sinniisoqarfianik 2014-mi ammaanerup ilaatigut USA-mik (...) iluaqutaasumik niuernikkut attuumassuteqarnissaa anguniarlugu siunissami siunissamut ungasinnerusumut sulisinnaanerput qulakkeerniarlugu.." aammalu "Issittoq pillugu naalakkersuinikkut ingerlatsinermi oqallisigineqarnerata annertusiartornera naapertorlugu aamma nunarsuarmi isumannaallisaanikkut naalakkersuinikkut ingerlatsineq Asia-mi pissaanilissuit Kalaallit Nunaannik eqqaaniittunillu soqutiginnilerneerisigut paasiu-manaannerulersiartortillugu, USA-mut pissutsit attaveqarnerullu aalajangiussimanissaa ineriartortinnissaalu salliutinneqassaaq – aamma aatsitassanik ujaasinerup iluani (uran pillugu naaggaarluinnarnerup atorunnaasinissaa ilanngullugu)".

Tamakkua pissutigalugit apererusunnarsivoq allaatigisami immikkoortut taakku qanoq paasisariaqarnerisut suullu kingunerissaneraat.

Qinnutigissavara apeqquteqaatikka ullut suliffiusut qulit qaangiutsinnagit akineqassasut.